

四庫全書

史部

欽定四庫全書

史部
西湖遊覽志卷三
七

詳校官太僕寺少卿臣李廷欽

刑部郎中臣許兆椿覆勘

總校官編修臣王燕緒

校對官中書臣葉蘭

謄錄監生臣劉達

欽定四庫全書

西湖遊覽志卷三

明 田汝成 撰

南山勝蹟

出湧金門折而南為兩峯書院

湧金門舊名豐豫門宋時有豐樂樓與門相值若屏
障然蓋堪輿家以此當山水之衝今移稍北近柳洲
寺

兩峯書院皇明太子太保刑部尚書洪公別墅也公
名鐘字宣之錢唐人歷官四川按察使發奸摘伏聽
決如流庭無宿訟時僉事屈銳者與公齊名故蜀有
洪不支鍋屈不解擔之謠尋以都御史巡撫順天等
府增築邊堡自山海關抵居庸延袤千里更巡撫雲
南貴州督理漕運四鎮十年始入刑部兼左都御史
復以川陝有藍馱之亂奉命征之寇平加太子太保
乞致仕築書院於西湖號兩峯居士

入南為靈芝宗福律寺

靈芝寺本錢王故苑芝生其間捨以為寺遂額靈芝
至宋而規制浸宏高孝兩朝四臨幸焉有浮碧軒依
光堂亦為新進士會年題名之所元末燬永樂初竺
源重建朱靜佳詩黃金匝地小橋通四面清平納遠
空雲氣長扶天子座日光浮動梵王宮殘碑幾字莓
苔雨清磬一聲楊柳風沙鳥不知行樂事昔人飛過
夕陽東 董嗣杲依光堂詩塵凝黼座憶垂衣今古

湖波錦四圍靈毓紫芝三秀遠光開綠玉片金揮松
隄自掩空蓮社石榻相朝卧柳枝半捲珠簾看落景
鼓簫長送畫船歸

寺畔舊有顯應觀楊王上船亭靈隱堂寶蓮院紫霄
院寶成院永隆院慧光庵正覺院超化院妙淨院寶
德寺並廢 顯應觀祀磁州崔府君者府君名子玉
唐貞觀間為磁州滏陽縣令有異政民立生祠既卒
為神於其上靖康間高宗為康王避金寇走鉅鹿馬

斃冒雨獨行值路三岐莫知所往忽有白馬道之暮
至祠下有土馬赭汗如雨因假寐廡下夢神人以杖
擊地促其行白馬復道至斜橋谷會耿南仲來迎馬
忽不見及即位復夢神將白羊饋之曰得孝子實兆
孝宗由是累朝崇奉六月六日生辰遊人闐沓咸淳
間改額昭應理宗書洞古經石刻後歸靈芝寺有蕭
照山水蘇漢臣畫壁

清波門過流福水橋瀕湖為學士橋折而南為茶坊嶺

清波門宋時稱暗門又南有錢湖門今塞

流福水橋瀕湖而引水入城經府前者

學士橋當故宋聚景園前蓋城中鐵冶嶺諸山之水
舊出錢湖門輸委於西湖者必經橋下大小岐派若
夾字然故稱夾字港港長九十六丈後人訛為學士
港然則學士橋者豈即夾字橋之誤歟而宋時咸淳
志夢梁錄諸書皆無夾字橋之名獨武林舊事有學
士柳浪等橋而柳浪聞鶯遂為西湖十景之一蓋不

可謂無據也。豈其時有文人為學士者得寵昵於從遊，應制題詠，遂以名橋若李太白偕尚書郎張謂遊沔州南湖，遂改南湖為郎官湖。近世孫一元著高士於西湖，遂改西湖為高士湖者，或此類也。橋久崩廢，惟條石丈餘橫跨港口，舟人以小艇入，艤清波門者，傴僂乃度。郡人王翰者好義士也，捐貲重建之，高廣倍昔。題其梁曰學士橋，蓋從郡人稱名之便。且疑以傳疑存舊蹟也。汝成為之記，立石建亭於橋畔。馬

浩瀾念奴嬌詞東風輕軟把綠波吹作縠紋微皺彩
舫亭亭寬比屋載得玉壺芳酒勝景天開佳朋雲集
樂繼蘭亭後珍禽兩兩鷺飛猶自回首學士港口桃
花南屏松色蘇小門前柳冷翠柔金紅綺幔掩映水
明山秀閒試評量總宜圖畫無此丹青手歸時侵夜
香街華月如畫

茶坊嶺宋時有茶坊在焉

清波門外沿城而北舊有聚景園僊姥墩並廢聚

景園孝宗所築先是高宗居大內時時屬意湖山孝
宗乃建名園奉上皇遊幸園中有會芳殿瀛春覽遠
芳華等堂花光瑤津翠光桂景灑碧涼觀瓊芳彩霞
寒碧等亭柳浪學士等橋疊石為山重巒窈窕其後
累朝臨幸理宗已後日漸荒落故高疎寮詩翠華不
向苑中来可是年年惜露臺水際春風寒漠漠官梅
却作野梅開不久而黍離之感作矣今惟柳橋尚存
世稱柳浪聞鶯者是也園傍舊有靈應堂俗呼包道

堂水心寺陸蓮庵法喜院興福院定水院凡浮屠之
廬九並歸園內 僊姥墩神僊傳云餘杭人也嫁於
西湖農家善採百花釀酒王方平嘗以千金過蔡經
家與姥沽酒飲而甘之是後羣僊時降因授藥一丸
以償酒價姥服化去後十餘年有人經洞庭湖邊見
賣百花酒者即姥也前所居基高數十尺今已夷為
坦途矣王介甫詩云綠漪堂前湖水綠歸來正復有
荷花花前若見餘杭姥為道僊人憶酒家

又西南過長橋為南屏山淨慈禪寺萬工池

長橋頗短而以長名者先時水口甚濶橋分三門有
亭臨之壯麗特甚其後浸淫填塞兩傍皆民居矣其
南舊有澄水閘南閘宋時錢湖門內諸山之水分為
三道雨甚則浸濁西湖故穿城至海子口流出省馬
院后為水渠引至澄水閘入湖而南閘者亦分方家
峪之水引歸長橋謂之三渠皆有石橋今亦湮廢董
嗣杲詩南港虛名架石梁寺樓鐘鼓幾斜陽相傳亭

跨危基壯誰見橋橫古道長澄水闌荒沙草碧清波
門近市塵黃鳳凰山在闌干外玉抹烟屏鷺一行

南屏山峯巒聳秀怪石玲瓏峻壁橫披宛若屏障凌
空而中峙者為慧日峯今以寺後卷石刻慧日峯三
字謬矣傍有石壁刻家人卦中庸樂記篇相傳為唐
人八分書而后人刻司馬溫公書五字亦非也又有
米元章書琴臺二字今皆不存張翥閏九日遊南屏
山詩山僧領客興何長慧日峯前俯太荒舊俗尚存

三令節人生難遇雨重陽丹楓換葉隨秋老黃菊留
花過閨香更欲磨崖訪陳蹟西風吹冷薜蘿裳丘
道源詩南屏高瞰府城西畫舸千艘共醉迷四柱堦
邊烟是幕百花橋畔葑連堤龍檀咽路迎輦雉綺繡
登山汗粉題暮色沉沉郭郭閉寶燈輝映梵天低

王伯安詩溪風漠漠南屏路春服初成病眼開花竹
日新僧已老湖山如舊我重來層樓雨急青林迴古
殿雲晴碧嶂迴獨有幽禽解相信雙飛時下讀書臺

孫太初卜居南屏山詩石上藤蘿對夕曛解衣長
日坐來頻挽回滄海真無計領畧青山合有人養鶴
侶嫌雙口累為漁又過一生身相逢惟是南屏老獨
樹柴門許結隣道人占斷南屏景十里青山帶郭
斜對水柴門通鶴渚隔隣烟火是漁家出頭老檜占
風雨石上菖陽閱歲華粧點太平還著我梭鞵桐帽
送生涯

淨慈禪寺周顯德元年錢王俶建號慧日永明院迎

衢州道潛禪師居之潛嘗欲從王求金鑄十八阿羅漢未白也王忽夜夢十八巨人隨行翌日道潛以請王異而許之始作羅漢堂宋建隆初禪師延壽以佛祖大意經綸正宗撰宗鏡錄一百卷遂作宗鏡堂太宗改賜壽寧院熙寧中郡守陳襄延禪師宗本居之屬歲旱湖水盡涸寺西隅甘泉出有金色鰻魚遊焉因鑿為井寺衆千餘飲之不竭名曰圓照井南渡時燬而復興僧道容實鳩工焉五歲始成塑五百阿羅

漢以田宇殿貯之五百羅漢者涅槃經云昔有五百
商人出海採寶值千盜攘去併剗其目日夜號痛有
告之曰靈鷲佛氏能救汝苦與我重寶引汝見之商
且行且捨至大林精舍佛為說法為證阿羅漢果散
處山林分形顯化作福人間蓋示人從生有貪因貪
受苦因苦得報之意其時塑像咸出一僧而儀貌種
異神氣如生像成而僧化去其第四百二十二位阿
濕毗尊者獨設一龕黃羅幕旁置籤筒側身偃蹇斜

目覩人而笑婦人祈嗣者必詣此炷香以手摩腹黑
光可鑒今龕廢矣紹興九年改賜淨慈報恩光孝寺
額既而復燬孝宗賜金成之御書慧日閣嘉泰四年
復燬嘉定十三年復建閱勝甲於湖山故程翰林琬
記文有濕紅映地飛翠侵霄簷轉鸞銅堦排鴈齒星
垂珠網寶殿洞乎琉璃日耀璇題金椽聳乎玳瑁之
語時宰臣建議以京輔佛寺推次甲乙尊表五山為
諸刹綱領而淨慈與焉廡壁作五十三參等像皆名

師鍾鼎丁清溪所畫也大抵規模與靈隱相若故二
寺為南北兩山之最東坡詩云卧聞禪老入南山淨
掃清風五百間其弘壯在南渡前已然矣先是寺僧
艱汲負擔湖濱紹定四年僧法薰以錫杖扣殿前地
出泉二派甃為雙井嗣是茗椀齋盃漱風曠月千衲
頤哺永無乏供丞相鄭清之為記淳祐十年建千佛
閣理宗書華嚴法界正徧知閣八字賜之元季時湖
寺盡燬而茲寺獨存皇明洪武間燬僧法淨建正統

間復燬僧宗妙建寺內有永明堂圓照樓鼓玉軒一
湖軒並廢鐵鍋重數千斤款云梁貞明二年鑄茲寺
之建在吳越時而鍋識貞明或從他寺移來未可考
也寺北有四眼井蘇子瞻謁宗本因和周別駕詩卧
聞禪老入南山淨掃清風五百間我與世疎宜獨往
君緣詩好不容攀自知樂事年年減難得高人日日
閒欲問雲公覓心地要知何處是無還 鄭清之雙
井詩水神何時生六翮飛出雙泉江練白平湖浸月

渺無邊一笑對之成揖客
輓轡初動曉星橫
夜捲寒瓊聲
渚渚千年佛殿礎
花乾十畝空庭蔭
修栢問泉何事起
竒觀故向庭前作
真澤昔年何塞今
何通泉豈有心
猶揀擇若云泉自井
中來枯甃沿山有
龜圻如言地中泉
自見是年何須穿
土脈幡風胥動兩
無干細詮此證歸
禪伯我方饒舌為
井記了不相干
勞刻畫寄詩更欲
結茶緣付與宗風
自鎚拍 白廷玉
詩奎額昭回龍屈
盤入門已覺厭塵
寰何當白髮三

千丈來寄清風五百間
帝子銜搖金漱灩
家人卦別翠孱顏
西湖日日船如織
半在南屏第一山
虞伯生詩
寒梅的的西來意
翠竹青青劫外春
日出碧鷄山作霧
臺空彩鳳地無塵
八年寫遍湖山好
萬里歸來月色新
我在錦官城裏住
白雲滿屋便為隣
王伯安詩
臥病空山春復夏
山中幽事最能知
雨晴階下泉聲急
夜靜松間月色遲
把卷有時眠白石
解纓隨意濯清漪
吳山越嶠俱堪老
正奈燕雲係遠思

姚公綬方丈詩第一橋頭歸日晡天風吹酒已全無
人家只隔東西崦烟水平分裏外湖自解金魚憐杜
甫誰招白鶴弔林逋兩峯勝槩山僧得好為南屏一

寫圖

萬工池在寺門外宋建炎已前寺累遭回祿鞠為荆
墟崇熙間有善青鳥之術者云須鑿池以禳之宗本
乃募化為此與力者萬人故名

寺畔有南屏興教寺廣教院寶相寺法性寺顯聖寺

空律寺惠照寺昭慶院廣法院希夷道堂翠芳園甘
園並廢 興教寺舊名善慶有齊雲亭清曠樓蘇子
瞻詩我識南屏金鯽魚重來撫檻散齋餘還從舊社
得心印似省前生覓手書封合平湖久蕪没人經豐
歲尚凋疎誰憐寂寞高常侍老去狂歌憶孟諸 廣

教院號小南屏 寶相寺晉天福九年吳越王建

法相寺宋乾德五年吳越王建 顯聖寺宋開寶五

年邑人羅仁德建 空律寺後周廣順元年吳越王

建俱元未燬 惠照寺今為淨慈香積 希夷道堂

劉蓑衣建 翠芳園舊名屏山園理宗朝改翠芳有

五花亭蘭棧梅榭咸淳中建宗陽宮亭館花石移取

殆盡 甘園在淨慈寺對舊為內侍甘升之園又名

湖曲園理宗嘗臨幸有御愛松望湖亭小蓬萊西湖

一曲後歸趙觀文又歸謝節使周密詩小小蓬萊在

水中乾淳舊賞有遺踪園林幾換東風主留得亭前

御愛松

淨慈寺後為蓮花洞居然亭

蓮花洞巧石層敷若芙蓉之燦爛居然亭在洞口登
茲則湖山風景揚眺無遺矣嘉靖間閩人洪玉方為
紹興守坐法逮會城寓淨慈刑部照磨張文仁築此
亭居之玉方曰一日茅棟成居然我泉石遂名居然
亭也

淨慈寺前為雷峯塔藕花居倪尚書墓

雷峯者南屏山之支脈也穹隆迴映舊名中峯亦曰

迴峯宋有道士徐立之居此號迴峯先生或云有雷
就者居之故又名雷峯吳越王妃於此建塔始以千
尺十三層為率尋以財力未充姑建七級后復以風
水家言止存五級俗稱王妃塔以地產黃皮木遂訛
黃皮塔俗傳湖中有白蛇青魚兩怪鎮壓塔下其傍
舊有顯嚴院雷峯庵通玄亭望湖樓並廢林逋詩中
峯一逕分盤折上幽雲夕照前村見秋濤隔岸聞長
松標古翠疎竹動微薰自愛蘇門嘯懷賢事不羣

又中峯望北山詩拂石翫林壑曠然空色秋歸雲帶
層巘疎葦際滄洲固自堪長往何為難久留庶將濠
上想聊作剡中遊

藕花居者洪武中淨慈僧廣衍建行以博學徵修大
典歸老於此林亭幽雅開傍湖濱長夏荷舒清馥滿
室塔畔有東退居者亦行別業也王伯安詩掩映紅
粧莫漫猜隔林知是藕花開共君醉卧不須扇自有
香風拂面來

高文端公墓太子少保文淵閣大學士高儀諭苑墓也文端錢唐人斥藕花居僧舍地莖焉

倪尚書墓者太子少保吏部尚書倪文毅公岳之祖墓也岳先世錢唐人國初徙南京

山畔舊有上清宮雲濤觀普寧寺淨相院珍珠園勝景園並廢 上清宮葛僊翁煉丹之所道士胡瑩微

築理宗御書清淨道場 普寧寺周廣順元年建名

白蓮寺大中祥符間賜額謝皇后香火有鐵塔一石

塔二 淨相院吳越王建有無盡意閣娛客軒一段
奇軒 珍珠園宋張循王俊別墅內有珍珠泉高寒
堂官庫取以釀酒 勝景園在雷峯塔路口高宗時
別館也光宗時慈福太后以賜韓侂胄改名南園陸
務觀南園記云慶元三年慈福以別園賜少師平原
郡王韓公其地實武林之東麓而西湖之水匯於其
下天造地設極湖山之美公既受命乃以祿賜之餘
葺為南園因其自然輔以雅趣方公之始至也前瞻

却視左顧右盼而模規定因高就下通塞去蔽而物
象列竒葩美木爭效於前清流秀石拱揖於外飛觀
傑閣虛堂廣廈上足以陳俎豆下足以奏金石升而
高明顯敞如蛻塵垢入而窈窕邃深疑於無窮乃悉
取先侍中魏忠獻王之詩句而名之堂最大者曰許
閒御翰也其射廳曰和容其臺曰寒碧其門曰葳春
其閣曰凌風其積石為山曰西湖洞天其瀦水藝稻
為園場為牧羊牛畜鴈鷺之地曰歸畊之莊其他因

其實而命之名堂之名則曰夾芳曰豁望曰鮮霞曰
矜春曰歲寒曰忘機曰照香曰堆錦曰清芬曰紅香
亭之名則曰遠塵曰幽翠曰多稼自紹興以來王公
將相之園林相望皆莫能及南園之髣髴者然公之
志豈在於登臨遊觀之美哉始曰許閒終曰歸畊是
公之志也公之為此名皆取於忠獻王之詩則公之
志忠獻之志也與忠獻同時功名富貴畧相埒者豈
無其人今百四十五年其後往往寂寥無聞而韓氏

子孫功足以名彛鼎被絃歌者獨相踵也或曰上方倚公如濟大川之舟公雖欲遂其志其可得哉是不然上之倚公與公之自處本自不侔天下知上之倚公而不知公之自處此南園之所以不可無述游老病謝事居山陰澤中公以手書來曰子為我作南園記游竊復思公之門才傑所萃也而顧以屬游者豈謂其愚且老又掛衣冠而去則廢幾其無諛辭無侈言而足以道公之志歟此游所以承公之命而不辭

也

南屏山之西為九曜山發祥祠

九曜山與赤山聯屬舊有九曜星君殿

發祥祠以祀昌化伯邵公林者公孝惠皇太后父也
太后侍憲皇生皇考睿宗獻皇帝于今上為祖母以
戚里恩封公伯爵嘉靖十九年勅塋于此給銀伍萬
餘兩阡隧崇巖甃斷工巧江南所無者其地舊為法
因寺吳越文穆王建有古鐵塔錢王井深冽雖旱不

枯

又西南過太子灣折而南為石屋嶺石屋洞蝙蝠洞大
仁禪寺

太子灣宋時莊文景獻二太子攢園

石屋洞高敞虛朗衍迤二丈六尺狀如軒榭可布筵
几其底邃窄通幽闇然密室周鑄羅漢五百十六身
仇仁近詩誰擘空青露石均遊龍伸臂下南高鬼神
穿鑿地脈碎風雨支撐天柱牢峭壁蒼苔侵佛髻懸

崖滴乳濕僧袍伽藍間是香山叟燈暗祠荒沒野蒿
蝙蝠洞在石屋洞側內產蝙蝠大者如鴉亦有純白
者其糞即夜明砂也建炎間里人避兵於中容數百
人皆免

大仁禪寺吳越王建宣和三年重修俗稱石屋寺其
對山名瑞峯塢下舊有淨梵院

又南過烟霞嶺為水樂洞烟霞洞

水樂洞在烟霞嶺下洞旁錢氏建有西關淨心院宋

淳熙六年以賜內侍李棗仍建佛宇巖石盤峙洞壑
虛窈泉味清甘聲如金石熙寧二年郡守鄭獬名之
曰水樂洞后二年蘇子瞻來為倅遂賦詩云君不學
白公引涇東注渭五斗黃泥一鍾水又不學哥舒橫
行西海頭歸來羯鼓打梁州但向空山石壁下愛此
有聲無用之清流流泉無絃石無竅強名水樂人人
笑慣見山僧已厭聽多情海月空留照聞道磬囊東
入海遺聲澗谷含宮徵聲奏未成君獨喜不須寫入

薰風絃縱有此聲無此耳嘉泰以來洞為楊郡王家
別圃累石築亭最稱幽雅年久蕪穢弗治水樂絕響
賈似道嘗用厚直得之命寺僧深求水樂所以廢興
者不得其說一日似道遊馬俯晚旁聽悠然有契曰
谷虛而后能應水激而后能有聲今水瀦其中土壅
其外欲其振響得乎亟命疏壅導瀦有聲從洞間出
節奏自然二百年勝槩於是始復乃葺亭以所得子
瞻真蹟刻置其上又取詩語名其亭若堂曰聲在曰

愛此曰留照曰獨喜他如介堂玉淵漱石宜晚則皆
紀其勝處又即山之左麓闢犖确為徑而上亭其三
山之巔杭越諸峯江湖海門盡在眉睫扁曰上下四
方之宇竒觀也洞中泉由愛此引貫其下入漱石匯
于聲在達于玉淵山之窪為池以受之每一撒捷伏
流飛注噴薄如崖瀑然景物之勝視昔有加而淨化
院則仍其舊云洞後有石佛接待庵相傳有聖僧頂
笠挑包隱形于石咸淳初建庵覆之今廢王大受詩

歷騁空寒六六天更來洗耳聽春泉
迅湍激石浮清磬樹溜行沙寫素絃
路口林亭三四曲洞中日月幾
千年何人獨得開收律譜入宮商
與世傳楊仲弘詩石林求路轉聲
牙來訪香巖大士家雨過門前生
薤葉風行隴上落松花懸崖滴水
鳴金磬激澗流泉走玉砂欲適山
林去城市久知寂寞勝紛華

洞傍舊有蒲覺院歸雲庵並廢
蒲覺院有法華泉

金蓮池 歸雲庵宋寧宗時有永清禪師坐石窟中

聞高峯鐘聲而悟道

煙霞洞晉開運元年有僧彌洪結庵洞口遇神人指
山後有勝蹟何不顯之洪忽見洞內有羅漢六尊顯
像石壁若鏤刻而成者甚異之未幾洪卒吳越王錢
氏夢僧告云吾有兄弟一十八人今方有六王可聚
之夢覺訪得烟霞洞有六羅漢遂補刻一十二尊以
符所夢洞後宋有清修寺今廢惟象鼻石佛手巖石
羅漢東坡留題尚存周紫芝詩瀕湖雨峯高屹立曉

相望蒼涼昇海日骭骭露千嶂羸驂絕陂陀巖谷飽
追訪緬懷洪荒初蘊蓄含萬象渾沌久已死倏忽真
巧匠誰今鑿空手出此竒嶮狀中虛納遊雲谷靜答
幽唱暗穴下無底濤聲相悲壯十八志聲聞附石出
遺像誰其架修椽置屋雲雨上青山不知數遶屋森
百丈忽於雨峯間萬頃見烟浪澎湃海潮聲往往入
藜杖天公愛此山令我拜嘉貺眇焉隔僊凡欲往漫
惆悵便當學枯禪綺語蠲宿妄自足伴周遊長年此

遊放

涉磴屈折而上為南高峯榮國禪寺

高峯在南北諸山之界羊腸詰屈松篁葱菁非芒鞋
布襪努策筇杖不可涉也塔居峯頂晉天福間建宋
崇寧乾道兩度崇修元季燬舊七級今存五級塔中
四望則東瞰平蕪烟消日出盡湖山之景南瀕大江
波濤洄洑舟楫隱見杳靄間西接巖竇怪石翔舞洞
穴邃密其側有瑞應像巧若鬼工北矚陵阜陂陀曼

衍箭櫪叢出薶麥連雲山椒巨石屹如峩冠者名先
照壇相傳道者鎮魔之所峯頂有鉢盂潭潁川泉大
旱不涸大雨不盈潭側有白龍洞龍王祠今廢

榮國禪寺即塔院也宋寶祐五年福王與芮建咸淳
六年安撫潛說友創華光閣五顯祠又拓徑以便登
陟今寺廢而五顯祠尚存

西湖遊覽志卷三

欽定四庫全書

西湖遊覽志卷四

明 田汝成 撰

南山勝蹟

自太子灣而西為玉岑山其對為赤山惠因澗惠因講
寺

玉岑山相傳其山產玉故潤媚異常孤峯秀拔層巒
繚繞中有古木倒植森翠凌冬崖上玉岑二字許采

書山門玉岑宋理宗書也

赤山其土赤埴故名由湖而陟此者近定香橋為赤
山埠其水曲為浴鵠灣張伯雨構水軒於此劉邦彥
詩浴鵠灣頭春水呼猿洞口晴雲漁歌欸欸互答樵
唱悠悠獨聞又詩春水初生浴鵠灣篴樓高枕對青
山鳥聲啼足忽飛去門掩綠陰清晝間自此而南過
大慈山出江干商旅不絕宋有牛羊滌宮在焉張輿
詩急雨斜風吹客衣赤山埠頭人渡稀欲行不行徒

步遲六橋新水漲平堤雲松冥冥曲徑迷採蓮舟傍
綠荷歸欸乃一聲天欲暝隔花驚起鷺鷥飛

惠因澗出自赤山經惠因寺前以入湖有蛟居澗中
故洞口鑄鐵為牕櫺嵌石以拒之高數尺因名鐵牕
櫺洞

惠因寺後唐天成二年吳越王建宋元豐八年高麗
國王子僧統義天入貢因請淨源法師學賢首教元
祐二年以金書漢譯華嚴經三百部入寺施金建華

嚴大閣藏塔以崇之元祐四年統義天以祭奠淨源
為名兼進金塔二所適蘇子瞻守杭上疏云自熙寧
來高麗屢入朝貢兩浙騷然皆因奸民徐戩等交通
誘引妄談庸僧淨源通曉佛法以致義天羨慕來朝
從源講解淨源既死其徒復持真影舍利違禁過海
以致義天差人祭奠兼進金塔探瞰朝廷受之則以
貪示外夷計構紛然朝貢踵接夷使所至圖畫山川
購買書籍不惟中國受疲而邊防亦疎乞却金塔勿

受絕其來意神宗從之寧宗書華嚴經閣理宗書易
庵元延祐四年高麗潘王奉詔進香繙經於此至正
末燬國初重葺俗稱高麗寺礎石精工藏輪宏偉兩
山所無

赤山左右舊有廣果寺開化尼寺法興寺保福院永
慶院真如院淨梵院崇教院寶林院廣法院修吉寺
正濟寺法雨寺安福尼寺極樂尼寺定光庵凝神庵
並廢 廣果寺在惠因橋北錢王建紹興初漕司試

兩浙士於惠因寺以廣果為別試院有虛悅樓鳳二
軒 開化尼寺慧智建 法興寺舊名法明 保福
院在長耳巷舊名寶慶錢王建有玉醴泉 真如院
貞觀初建 淨梵院舊名瑞峯寶林院錢王建有可
賦軒 廣法院內有清曠亭 修吉寺舊名瑞龍為
郭夏季韓四皇后攢宮 法雨寺舊名水心續改雲
龍犬中祥符賜額 安福尼寺尼普隆建 極樂尼
寺尼德勤建 定光庵在法相寺西有泉盤瀑飛洒

濺沫如珠雖旱不竭名定光泉 凝神庵蒲衣道士

張達道所居高宗嘗賜白羽扇至元猶存薩天錫詩
晴日赤山湖水明湖中山影一眉青蒲衣道士無人
識羽扇年多落鳳翎

惠因寺而北為法相律寺六通律寺筍箕泉

法相律寺俗稱長耳相後唐時有高僧行修號法真
年十三進具遍叅諸方得法於雲峯存公生有異相
耳長九寸上過于頂下可結頤號長耳和尚天成二

年自天台國清寒巖遊錢唐吳越王待以賓禮居相
法院乾祐四年跌逝高足漆其真身存焉寺內有錫
杖泉劉士亨賀法相寺海納庵上人詩湖上招提信
少雙翠微樓閣白雲牕耳聞古佛遺真像眼見高僧
豎大幢袖掛紫藤驚鼠窺鉢分滄海毒龍降懷香欲
叩毘尼藏寸筵臨鐘不易撞

六通律寺舊名六通慈德院吳越王建有辟塵爐非
木非石扣之錚然纖塵不染

筭箕泉出赤山之陰合于惠因澗元時有黃子久公
望者號大癡卜居泉上子久善畫有山水訣傳於世
赤山之北為三台山于肅愍公墓

于公名謙字廷益錢唐人英廟北狩時公以兵部尚
書任國事外攘內撫有社稷功英廟復辟奸臣石亨
徐有貞等忌譖之誣公不軌竟以冤死其子冕奉塋
於此成化二年廷議始白上遣行人馬暉諭祭之其
詞畧曰當國家之多難保社稷以無虞惟公道以自

持為權姦之所害在先帝已知其枉而朕心實憐其
忠弘治七年賜謚曰肅愍建祠曰旌功鄭繼之詩太
傅出南方眉宇天人表曩在英廟朝讜論多了了三
邊正統末干戈日倣擾先皇巡朔方敵騎伏潢洺黃
雲阨塞垣僂仗迷周道法駕一蒙塵作意索金寶京
城既搖動和議雜紛繚公時贊戎機決策截瀾倒告
廟定儲君誓衆守隍堡耀兵向陰山真欲舉征討居
庸扼咽喉鐵馬豈得搥坐令敵計窮食盡師遂老翠

華果全歸黃屋免再造雖重獲罪戾社稷功非小功
高反殺身於古亦嘗蹈固由天威赫實為青蠅繞天
日終輝輝即見是非瞭神衷啓后聖殊錫達幽眇憶
昔靖康亂謀國何草草堂堂宗諸良唯唯遵和好甘
心拜勅敵所以至絕島直書在史氏公節須皦皦
三台山之前為栗山八盤嶺周真人墓

周真人思得仁和人精五雷法揣測休咎輒驗皇明
永樂初召試嘉獎建天將廟居之扈從北征累著勞

續歷事仁廟宣廟英廟寵賚特厚景泰改元懇乞還
山年九十三卒訃聞遣行人許篈諭祭贈號真人勅
葬于此

自三台山而北為小麥嶺東嶽行宮靈應廟永福橋

小麥嶺其地宜麥故名西有支徑可通大麥嶺蓋積
慶山之陂陀迤邐者

東嶽行宮宋咸淳中建以奉泰山之神

靈應廟其神蔣通實直孝親紹興十一年七月坐化

桐木下時騰曦熾烈七日如生累見靈異境內賴之
事聞詔為立廟崇祀

永福橋俗稱飲馬橋吳越宋時皆牧馬于此

嶺畔舊有旌德顯慶寺靈隱觀太清宮淨林廣福院
冰壑書堂贊寧塔梅坡園並廢 旌德顯慶寺宋慈

明太后香火賜田三千畝後山泉石甚奇有雲扉軒
清壑凝紫靜雲等亭 靈隱觀宋寧宗時中貴張氏
初御書冲隱庵淳祐中道士范善遷重建賜名今額

庵在觀右而觀改仁壽矣 太清宮寧宗時朱靈寶
守固建楊太后書道德經刻石幢有歲寒軒養性凝
神堂後為賈貴妃功德寺 冰壑書堂宋樞密金淵
號冰壑築室於此因塋焉積慶永清二山在後平鼎
山在左湖山在前凡錢唐城邑江湖之勝近在几席
乃南北二峯中之最高山也有君子天一二泉理宗
御書積慶山怡顏葺書農圃以賜又賜寺額曰積慶
教忠不及建而止 贊寧塔贊寧高氏德清人出家

杭州祥符寺著述毘尼時人謂之律虎錢武肅王禮
重之宋興國初召對滋福殿詔修高僧傳三十卷卒
謚圓明塋龍井 梅坡園楊太后宅業在顯慶寺西
董嗣杲詩云園丁自飽栽花利月入楊家得幾何者
是也

又西為大麥嶺其傍為花家山

大小麥嶺當南北兩山之界又西北過僊芝嶺出九
里松大麥嶺有蘇軾王瑜題名

花家山一名蛇山瀕湖而登為茅家埠仇仁近詩間
循石澗列雲扉樹影生涼怯亭衣靜碧軒窻聊寄傲
軟紅塵土竟忘歸滿傾竹葉春霞滑輕摘蕉花曉露
稀禪意法乘俱莫問且談舊事共依依

嶺畔舊有法空寺資聖院盧園淨安院崇真宮淨嚴
院隆興庵水陸庵妙心寺並廢 法空寺舊名資慶

資聖院為濮王墳 盧園宋內侍盧允升小墅景

物竒秀有池文石甃砌水洌而深異魚種集西湖十

景所謂花港觀魚卽此地也 淨安院宋內侍董宗

臣香火院 崇真宮舊為女冠後改永淨尼寺 淨

嚴院內侍董永仲香火院 隆興庵楊府廨院 水陸

庵亦楊府廨院又名慶安院

自永福橋折而西北為靈石山元道士張伯雨墓明尚
書徐公墓

靈石山亦名積慶山林壑中時有景光蜿蜒扶輿狀
若異物山畔有平鼎永清馬鞍延壽等山靈石之麓

舊有吳越太尉薛公墓今廢薛公居正任武肅王塚
前生紫藤遍遶三峯其三世孫昂任宋為尚書左丞
人謂紫藤之瑞應也墓側有白蛇巖崑崙巖

張伯雨墓伯雨名天雨錢唐人號居貞子又號句曲
外史宋崇國文忠公九成之後年二十棄家遊天台
括蒼諸名山晚入開元宮從真人王壽衍為道士風
裁凝峻見者異之工書能詩文更奇古與吳興趙孟
頴浦城楊載蜀郡虞集豫章揭傒斯清江范梈金華

黃潛友善嘗屏居修茅山誌墓近玉鈞橋伯雨賣玉鈞所建也墓久頽廢成化間嘉興姚公綬葺之既為立傳復為之銘曰嗚呼此句曲外史居貞先生張公墓也南屏之右西湖之陽梁題玉鈞澗渡靈石路披篠樹塢帶烟霞石室藏書碑文紀事其形雖逝其神則存翰墨在人文章垂世儼然生氣之張皇聲歎無聲周旋滅影穆若太虛而示寂開元精舍久無繼續之賢句曲居貞全乏訪求之彥遂使墓門荒翳北趾

崩奔松栢摧為薪莫設時樵之禁身世是何物曾罹
夜客之侵痛茲劍躍雷津慨爾硯離玉匣既往何咎
將來可圖曠世而默契予心尚友而景行前哲

尚書徐公墓公名琦字良玉錢唐人宣德初以左通
政使安南黎利餽金珠香繒甚厚琦悉却之少師楊
士奇畫梅題詩贈之云兩度安南奉使來玉葩曾見
嶺頭梅天朝使者清於玉不帶飛塵半點回

山畔舊有靈石寺崇德顯慶院崇因報德院並廢

靈石寺在棲真院之上 宗德顯慶院舊名棲真樞
密使章崇建有墓在馬元祐中僧善本居之號大通
禪師示寂名定光塔後為永王祈王殯所 宗因報
德院在鷓鴣峯側有靈石泉又名歲寒泉高宗嘗臨幸
焉與積慶山永清院皆開府薛居正功德后院廢而
靈石泉猶存

又西北為鷄籠山風篁嶺一片雲石楊梅塢獅子峰延
恩衍慶講寺龍井神運石

風篁嶺多蒼篔簹篠蕩風韻淒清至此林壑深沈迴出
塵表流淙活活自龍井而下四時不絕嶺故叢薄荒
密元豐中僧辨才淬治潔楚名曰風篁蘇子瞻訪辨
才龍井送至嶺上左右囑曰遠公過虎溪矣辨才笑
曰杜子有云與子成二老來往亦風流遂作亭嶺上
名曰過溪亦曰二老子瞻紀之詩云日月轉雙轂古
今同一丘惟此鶴骨老凜然不知秋去住兩無家人
士爭挽留去如龍出水雷雨捲潭湫來如珠還浦魚

鼉爭駢頭此生暫寄寓常恐名實浮我比陶令媿師
為遠公優送我過虎溪溪水常逆流聊使此山人永
記二老遊大千在掌握寧有離別憂 張仲舉陪劉
時中遊風篁嶺詩山行貴徜徉緩轡不可驅天竺已
幽阻風篁更盤紆前瞻乳竇峯錯立石笋株洩雲相
虧蔽蒼翠變態殊層梯俯山巔中豁見西湖晴冥散
遠鴈秋色連平蕪陰崖湛坳泓直下龍所都森突人
上慄雷水止斯須泉流緊活活魚出聞于于飛霜未

著樹綠陰尚紛敷
茲晨正佳節
况得暄暖扶雙亭
俯澗谷
列坐陳酒壺
松風吹桂華
香韻世所無
奉常老博士
幾載賜茱萸
歸來北山南
同此寂寞娛我友
二三子
文采珊瑚珠
懽然隨所適
形蹟安能拘
窮探忘前期
欲罷重踟躇
浮風收不上
屐底青模糊
炊烟忽生暝
落日棲啼鳥
終當借上方
雲臥蘿月孤
勿盡茲遊興
與君為後圖

嶺下沙盆塢
宋有陳剛中墓
今廢剛中福州閩清人

建炎初任太府寺丞上封事議恢復忤秦檜遂與張九成等七人同謫其詩云同日七人俱去國何時萬里許還家尋謫知安遠卒歸塋於此

一片雲石在風篁嶺上高可丈許青潤玲瓏巧若鏤刻松磴盤屈草莽間有石洞堆砌工緻巉巖可賞

楊梅塢近瑞峯塢宋時有金媪者所栽楊梅盛美因以起塢蘇子瞻答參寥惠楊梅詩新居未換一根椽只有楊梅不直錢莫共金家鬪甘苦參寥不是老婆

禪蓋謂此也至今其地楊梅異於他產

獅子峯高出羣岫可瞰江滸北望天竺諸峯疊秀如
畫楊廉夫獅子峰觀潮詩海國梅清瘴雨收胡床高
踞碧獅頭三韓水接天無盡百越山窮地欲浮樓閣
剛風吹碧蜃旌旗落日照紅鯀行人莫問驅潮事潮
落山西淺十洲獅子擎雲涌翠巒我來親拂頂花
看隨潮月上樓臺濕度海雲生鐘磬寒蓬島未應三
萬隔桑田今有幾回乾大千不究恒沙界細問彌天

釋道安

延恩衍慶寺俗稱龍井寺唐乾祐二年居民凌霄募
緣建為報國看經院宋熙寧中改壽聖院蘇子瞻書
額紹興三十一年改廣福院淳祐六年改是額元豐
二年辨才禪師自天竺歸老于此不復出入與蘇子
瞻趙閱道友善後人因建三賢祠祀之有歸隱橋方
圓庵寂室照閣間堂訥齋潮音堂滌心沼薩埵石冲
泉諸天閣諸勝元祐以來名賢留題甚多東坡竹石

廉宣仲枯木楊次公詩十三首風篁嶺云微風搖琅
玕蕭瑟嶺一道萬箒掃晴空纖塵不可到 龍井云

崖下一泓泉竊奧不可測有時靈氣生散作人間澤

歸隱橋云道人從此歸影不入塵市端坐笑浮雲
往來太多事 滌心沼云縱有狂風生未嘗險浪起

何當招世人來此鑿清泚 獅子峯云巖風壯威猛

晴雷隱哮吼無心露爪牙百獸自奔走 薩埵石云

解虎錫常聞飼虎石長在忘軀度有情清風幾千載

潮音堂云潮來音普聞潮平音亦歇孰若此山堂

潮音未嘗絕 訥齋云天道竟何言四序自流轉那

知毘耶翁雖然真大辯 冲泉云不汲泉不盈愈汲

泉愈清湛然有常德隨氣利羣生 寂室云白雲隔

塵喧虛堂太岑寂寒盡春自來鶯啼報消息 照閣

云幽人無適莫乘興登高閣夜月鎖寒林春花繡巖

壑 閒堂云趙公歸休年訪師翠微間始知浮世上

白日兩人間 方圓庵云地方不中矩天圓不中規

方圓庵裏叟高趣有誰知 秦少遊遊龍井寺記元
豐三年秋後一日余自吳興道杭東還會稽龍井有
辯才大師以書邀余入山比出郭日已夕航湖至普
寧遇道人參寥問龍井所遣籃輿則曰以不時至去
矣是夕天宇開霽林間月明可數毫髮遂棄舟從參
寥策杖並湖而行出雷峯度南屏濯足於惠因澗入
靈石塢得支逕上風篁嶺憩于龍井亭酌泉據石而
飲之自普寧凡經佛寺十五皆寂不聞人聲道旁廬

舍或燈火隱顯草木深鬱流水激激悲鳴殆非人間
之境行二鼓始至壽聖院謁辯才於潮音堂明日而
還

龍井本名龍泓吳赤烏中葛稚川煉丹於此林樾幽
古石鑑平開寒翠甘澄深不可測疏澗流淙泠泠然
不舍晝夜聞花寂草延緣其旁或隱或見蒼山圍繞
杳非人間時聞鳥韻樵歌響答虛谷井中相傳有龍
居焉禱雨多應或見小蟹斑魚蜥蜴之類上覆以樓

為惠濟龍王祠水經飲馬橋合黃泥嶺東出茅家埠
入湖秦少游龍井記畧云龍井當西湖之西浙江之
北風篁嶺之上深山亂石之間西湖深靚空濶納光
景而涵烟霏菱芡荷花之所附麗龜魚鳥蟲之所依
憑漫衍而不迫紆餘以成文陰晴之中各有竒態故
岸湖之山多為所誘而不克以為泉浙江介于吳越
之間一晝一夜濤頭自海而上者再疾擊而遠馳兕
虎駭而風雨怒遇者摧當者壞乘高而望之使人毛

髮盡立心掉而不禁故岸江之山多為所脅而不暇
以為泉惟此地盤幽而宅阻內無靡麗之誇以散越
其精外無豪悍之脅以虧踈其氣故嶺之左右大率
多泉龍井其尤者也夫蓄之深發之遠其養也不苟
則其施也無窮龍井之德蓋有至於道者其為神物
之託也宜哉 虞伯生次鄧文原遊龍井詩杖藜入
南山却立賞竒秀所懷玉局翁來往絢履舊空餘松
在澗仍作琴筑奏徘徊龍井上雲氣起晴晝入門避

霑洒脫屐亂苔甃陽岡扣雲石陰房絕遺構澄公愛
客至取水挹幽竇坐我蒼筍中餘香不聞嗅但見瓢
中清翠影落羣岫烹煎黃金芽不取穀雨後同來二
三子三咽不忍嗽講堂集羣彥千磴坐吟究浪浪雜
飛雨沈沈度清漏令我懷幼學胡為裹章綬 姚公
綬詩龍井泉頭與客過計程遠度石崖栽菜畦麥隴
連山麓僧寺人家各澗河決決暗流霜葉亂斑斑飛
雉夕陽多品嘗顧渚風斯下零落茶經奈爾何 孫

太初飲龍井詩眼底閒雲亂不開偶隨麋鹿入雲來
平生於物元無取消受山中水一盃

神運石高可六尺許竒怪兀突特立簷下有木香一
架穿繞竅竇宛若蛇蟠皇明正統十三年中貴李德
駐龍井屬旱令力士淘之初得鐵牌二十面玉佛一
枚金銀各一錠鑿大宋元豐年號次得茲石以八十
人搜出之上有神運二字旁多款識漶漫不可讀不
知何代所鑄也繼得鐵牌十五面銀二條上鑿吳赤

烏年號蓋皆投龍以祈雨者其日黑雲四匝泉頭洶湧德懼而止疏其傍池三日插劍曰浣花曰浴麟德交趾人幼警悟讀書一目下數行洪武間黎王以獻高王喜之昵侍左右歷事五朝頗著勞績鎮守兩浙卒勅葬於風篁嶺下

嶺畔舊有崇恩演福寺辯才塔無垢院淨林廣福院顯應廟並廢 崇恩演福寺俗稱南天竺隋開皇中有法師真觀居之雅操高潔骨格存焉側有靈石塢

了髻峯僊人碁臺金沙井回泉鍾液龍井景趣幽清
聽眺俱爽自此過嶺值中天竺乾道間有道士四人
來寺乞食時午齋已罷拒不與道士索筆題椽間云
南塢數回泉石西峯幾疊烟雲登攜孰與為侶顏寓
李甲蕭耘人以為首句藏呂字次洞字次賓字末乃
同行三人也書法類李北海咸淳間賜田五千畝元
初名僧清古源澤雲夢等疊主之號稱教海有白蓮
院夕佳樓張伯雨夕佳樓詩西山朝氣爽南山夕氣

佳朝爽人共忻夕佳吾所懷山僧閱世久結廬深避
乖蕙樓將對寺茵閣亦雙排維南列崇阜不受烟嵐
霾我亦遲暮人心迹倦鳥偕茲馬記高躅庶與靜者
諧徐一夔訪玳法師宿夕佳樓詩寓縣俄多難湖
山亦被兵名藍俱泯滅別構獨崢嶸翰墨看前輩登
臨愧後生嚴城圍列嶂半鑑出澄泓直篠侵簷上纖
蘿附牖榮倚闌雲鳥度極目鏡天平日夕景逾好秋
高思轉清殘陽樹間沒薄靄水邊橫紫翠霏微合丹

鉛點染成茅津有漁唱麥嶺少人行暝色松門動寒
颼竹嶼鳴疎鐘度餘響遠火露青熒僊梵微微出爐
烟裊裊輕山盤撲露寶石鼎泛雲英洗濯塵凡盡歸
依誓願精行當陪竺士聽法破無明 辯才塔在演

福院內蘇子由銘云如來昔在世心禪語為教譬如
四大海惟是一濕性性於濕性中變化千萬億風來
為濤瀾風去為湛然魚龍所遊戲鬼神所出沒船筏
借其力網罟取其利其上為洲渚諸國所生育其下

為淵谷百怪所藏伏東西出日月上下屬河漢觀者
不能了睥眄何暇說如來知迷悶隨變為解釋因變
所說者是則名為教彼善聞教人當知是幻爾既已
知是幻則當識其實我觀世教師皆謂教是實由謂
教實故則為禪所訶禪雖訶乎教終以教致禪禪若
不取教是杜所入門教而不知禪是不識家也辯才
真法師於教得禪那口舌如翻瀾而不失道根性湛
如止水得風輒燦然心是於東西普福禪教師士女

常奔走金帛常圍繞師惟不取故物來不能拒道成
盡有數西方一瞬息西方亦非實要有真實處 無
垢院乃無著禪師道場也舊在石人嶺慶元中韓平
原為生墳遂移寺於此嘉定間重建有清音軒茯苓
泉與廣福院俱併為廣福寺 淨林廣福院開府楊
慶伯祖墳上人呼上楊庵有松關南泉桂芳亭姜白
石與恬朴翁等來遊詩四人松下共盤桓筆硯花壺
石上安今昔興懷同此味老僊留宇在孱顏內有噴

月泉僧錄泉在暗竹園下 顯應廟宋時以祀郡守
胡公則仕當真宗仁宗朝再牧杭州有惠政退老西
湖深尊雅絃左子右孫日與交親歌笑輿論重之寶
元初天子特命其長子楷通守杭州以便養卒葬於
此數見靈異遂立廟祀之

嶺北為碁盤山

山頂有方石舊傳丹砂為局子分黑白今已漉漫登
其巔則江湖之勝皆可環眺矣

龍井之上為老龍井

老龍井有水一泓寒碧異常泯泯叢薄間幽僻清興
杳出塵寰岫壑縈迴西湖已不可復覩矣其地產茶
為兩山絕品郡志稱寶雲香林白雲諸茶乃在靈竺
葛嶺之間未若龍井之清馥雋永也再上為天門可
通靈竺徑術崎嶇草樹蒼鬱人烟曠絕幽悄不禁

龍井之南為九溪其西為十八澗

九溪在烟霞嶺西南路通徐村水出江干北達龍井

張光弼詩春山縹緲白雲低萬壑爭流下九溪擬溯
落花尋曲徑桃源無路草萋萋

十八澗在龍井之西路通六和塔

西湖遊覽志卷四

欽定四庫全書

西湖遊覽志卷五

明 田汝成 撰

南山勝蹟

自南屏山而南過錢糧司嶺折而西為廣澤禪寺甘露泉

錢糧司嶺吳越王建司於此以徵山課嶺側有龍母

池乾溪水

廣澤禪寺舊名甘露晉天福六年吳越王建有泉一泓甘澄可啜若甘露然故以名寺宋治平二年改額廣澤國初燬天順八年重建

又西南為大慈山定慧禪寺虎跑泉

大慈山去城可十里在龍山西其北有樵歌嶺戒定巖

定慧禪寺俗稱虎跑寺唐元和十四年僧寰中建憲宗賜額曰廣福院大中八年改大慈禪寺僖宗乾符

間加定慧二字宋末燬元大德間重建又燬皇明正
德十四年寶掌禪師重建嘉靖十九年又燬二十四
年山西僧永果重建 蘇子瞻詩紫李黃瓜村路香
烏紗白葛道衣涼閉門野寺松陰轉敲枕風軒客夢
長因病得間殊不惡安心是藥更無方道人不惜堦
前水借與匏尊自在嘗陳浩和詩良二千石昔清賞
虎跑泉頭風露涼直將才華比賈傅徧歷山川如子
長流傳玉局播千古脈絡銀河來上方清秋擬到三

天竺自裹春茶來煮嘗釋來復和詩金沙泉湧雪濤
香灑作醍醐大地涼倒浸九天河影白遙通百谷海
聲長僧來汲月歸靈石人到尋源宿上方欲著茶經
校竒品山瓢留待羽僊嘗

虎跑泉宋學士濂銘叙云虎跑泉在杭之南山大慈
定慧禪院距城十里而近唐元和十四年性空大師
來遊茲山樂其靈氣鬱盤棲禪其中尋以無水將他
之忽神人跪而告曰自師之來我等徼惠者甚大奈

何棄去南岳童子旋當遣二虎來移師無憂也翼日
果見二虎跑山出泉甘冽勝常大師因留建立伽藍
蘇文忠公守杭為之賦詩有虎移泉眼赴行脚之句
蓋紀實也師名寰中蒲坂盧氏子得法於百丈海一
時龍象如南泉願臨濟玄趙州諗巖頭叢雪峯存無
著喜欽山邃咸來咨叩道要則其德服鬼神彰灼靈
異有不難致者於戲拔劍刺山水為之湧折腰拜井
泉乃仰流武夫健將一誠之所格尚若此况大師心

悟無際者乎洪武戊午冬十有一月瀟朝京師道經山下令主僧定岩戒有道之士也邀瀟觀泉且披法衣率其徒同舉梵咒久之泉盛沸而出若聯珠然已而微作湧勢瀟心異之遂為作銘銘曰天一所形厥質乃凝潛行重淵與勢俱升至人來居地不愛寶誰信清泠生於虎爪山后川君與道為謀肯私一勺不師之留師既留止化泉為雨式沛且滂潤於千里幻此荒虛遂成寶坊羣生依之為正法幢命世大才猶

龍類象來遊來咨如山答韻代祀雖邈聲華弗虧至
今草木尚被餘輝我於世緣逢觸輒礙泉特相知獻
萬珠琲擾擾征騷風埃渺瀰有素者衣化而為緇願
挹寸波如習禪定洗滌根塵一時清淨 蘇子瞻詩

亭亭石塔東峯上此老初來百神仰虎移泉眼趨行
脚龍作浪花供撫掌至今遊人盥濯罷臥聽空堦環
珮響信知此來如此泉莫作人間去來想聶大年和
詩中峯有路盤桓上前代遺蹤成俯仰老禪對客欲

忘言塵事惱人空鞅掌梵音時答海潮聲山雨暗添
泉溜響儵然長揖下烟蘿玉珂漫使因風想張興詩
步屨看花入翠微暖風蘭氣襲人衣虎曾聽法跑泉
出龍或逃禪挾雨飛寰悟鑿空開洞府東坡遺跡著
巖扉世情總被凡僧惑泡影觀來果是非蓋虎跑泉
本非因咒而起者以人聲振動之則加沸耳

又西南為崇先龔慶禪寺真珠泉

龔慶禪寺俗呼真珠寺舊名薦福院晉開運間吳越

王建為清鑑禪師道場宋大中祥符六年改崇教院
開慶元年賜今額

真珠泉在龍慶寺內周顯德間泉自地迸出寺僧因
甃為方池聞剝啄聲則泉益湧累累如貫珠宋景祐
中官家取以釀酒遂以為酒名雷峯路口張園亦有
真珠泉董嗣杲詩泉光四散駭猿猱迸起平池點滴
高誰欲斗量徒積夢人將瓶汲肯辭勞聲隨後雨穿
疎箔名逐春風入小槽別有雷峯峯下圃一泓埋沒

在蓬蒿

西湖遊覽志卷五

欽定四庫全書

西湖遊覽志卷六

明 田汝成 撰

南山勝蹟

自清波門折而南為筆架山方家峪忠節祠褒親崇壽
教寺

忠節祠以祀宋太學生徐應鑣者應鑣衢州人宋亡
義不降敵與其二子琦崧女元娘俱赴井死同舍劉

生等收其屍葬於此朝命贈為秘閣修撰正德間參政梁材奏請立祠有司春秋致祭

褒親崇壽教寺俗稱劉娘子寺宗紹興十八年劉貴妃建貴妃臨安人入官為紅霞帔得幸累遷才人婕妤婉容尋進貴妃專掌御前文字工書畫畫上用奉華堂印然恃寵驕侈常盛夏以水晶飾脚踏高宗見之取以為枕妃懼自此少戢父懋因金人南侵獻錢二萬緡以助軍費高宗嘉之遂令建寺以為功德有

泉自鳳凰山而下注為方池命為鳳凰泉于湖張孝
祥書刻內有松雪亭觀音洞筆架池偃松交枝檜壁
間舊有陳公儲畫龍甚奇并陽翁詩翟羽鸞綉事已
空奉華遺寺對高松宮斜鳳去無人見且看門前粉
壁龍 秦少游詩匹馬驕嘶石路斜觀音洞口踏烟
霞普陀風景差相似只欠潮音小白花 周端臣詩
萬竹蒼寒擁寺門寺碑金字御書存榮華肯信當年
事儀制空留後世恩影閣有聲塵網暗殞宮無月上

花昏見梅不敢輕攀折恐是香風水際魂

方家峪畔舊有永隆寺遇真院悟真院崇真院廣慈院廣嚴院廣福院淨教院寶藏院西蓮瑞相院西林法惠院安福禪院並廢 永隆寺僧淨林建 廣福院陳淑妃香火又名報恩 淨教院祭貴妃香火

寶藏院有烏龍井錢武肅王廟碑 西蓮瑞相院黃

貴妃香火 西林法惠院宋乾德三年建慶歷間禪

師法言作西軒激水為池疊石為山灑粉峯巒草木

之上以象飛雪蘇子瞻見而愛之題曰雪齋秦少游
為之記子瞻詩君不見蛾眉山西雪千里北望都城
如井底春風百日吹不消五月行人如凍蟻紛紛市
人爭奪中誰信言公似贊公人間熱惱無處洗故向
西齋作雪峯我夢扁舟適吳越長廊靜院澄如月開
門不見人與牛惟見空庭滿山雪 安福禪院內侍
陳都知香火

又西南為華津洞梯雲嶺

華津洞宋時趙冀王園中層疊巧石為之者曲引流
泉灌之水石奇勝花竹蕃鮮有僊人碁臺在焉

梯雲嶺石磴峻絕嶺下舊有水月寺宋太平興國二
年建元末燬有水月池靈固石蘇子瞻詩千尺長松
掛辟蘿梯雲嶺上一聲歌湖山深秀有何處水月池
中桂影多

折而南為慈雲嶺永壽禪寺

慈雲嶺者龍山支脈也故其山名寺額多以龍名石

壁間篆刻梁單闕之歲興建龍山至浚灘之歲開慈
雲嶺一十八字嶺之巔有亭曰江湖偉觀嶺下有觀
音洞洞口有下石龍庵今廢

永壽寺舊名資仁後改上石龍永壽院吳越王建石
壁上刻宋仁宗佛牙讚讚辭鄙陋蓋偽為者

嶺下舊有惠光尼寺地藏尼寺福全尼院淨勝院並
廢 惠光尼寺乾道間張循王女孫真寂自幼為尼
奉韋太后香火相繼住持皆張氏女也有佛指放光

故名 淨勝院舊名下石龍

嶺之南為龍山

龍山一名卧龍山又名龍華山與上下石龍相接去
城南可十里許天目分支沿江而東結局於此蜿蜒
若遊龍然山北有鴻鴈池其東為白塔嶺

其上為天真禪寺登雲臺其下為勲賢祠為天龍禪寺
天華禪寺勝相禪寺龍華禪寺宗藉田

天真禪寺梁龍德中錢王建寺居山頂今惟一庵存

焉

登雲臺後梁龍德中錢王建又名拜郊臺蓋錢王借郊天地之所也臺側有靈化洞武肅王勒壁存焉洞深百步濶十餘丈和靖東坡題名

勲賢祠舊名天真精舍在天龍寺之左嘉靖九年僉事王臣揭陽薛侃會稽錢德洪王畿釀金鬻寺僧地創建精舍祀新建伯王文成公守仁中為祠堂後為文明閣藏書室傳經樓望海亭諸處置膳田以待四

方學者萬曆二年侍御萬安蕭公按浙增建凝道堂
八年毀天下書院而精舍亦混為里甲所佃十一年
蕭公督撫兩浙與侍御江陰范公慨焉傷之為請於
朝禮部是兩公議復祠與田仍欽賜祠額有司春秋
致祭如禮云 王伯安西安雨中寄德洪汝中并示
書院諸生詩幾度西安道江聲暮雨時機闕鷗鳥破
蹤蹟水雲疑仗鉞非吾事傳經愧爾師天真泉石秀
新有鹿門期 又寄答德洪汝中方卜書院盛稱天

真之竒詩不踏天真路依稀二十年石門深竹徑蒼
峽瀉雲泉泮壁環胥海龜疇見宋田文明原有象卜
築豈無緣

天龍寺宋乾德三年吳越王建以居鏡清禪師大中
祥符元年改名感業建炎三年大火惟木觀音像獨
存紹興十三年建園丘以淨明院為齋宮以感業居
從官從此僧徒漸散而寺亦圯元延祐間僧道平重
建至正間南北兩山諸刹或燬或頽惟天龍僅存寺

有堂扁曰山舟貫雲石所書寺中有凝翠井余士吉
詩龍飛鳳舞兩峯回王氣纔銷梵宇開卓錫地侵行
輦地雨花臺近拜郊臺草分野色緣城去風引江聲
入寺來三百年過如昨日老禪猶說舊蓬萊 張輿

詩鳳凰山中多古寺天龍之境何深幽半空花雨春
浮殿萬壑松聲風滿樓宋室園丘禾黍合胡髯方丈
石泉流吟哦不盡登臨興落日滄江生客愁 劉士

亨山舟詩高僧住處屋如舟臥穩渾無夜壑憂篙櫓

不施隨地泊波濤已斷樂天游香飄半入蒼龍窟夢
落多迷白鷺洲喚起酸齋狂學士虎溪溪上共夷猶
天華寺舊名千春龍冊為鏡清禪師道場有頤軒妙
音樓化生池

勝相寺舊名龍興千佛庵開成中建錢氏時有西竺一
僧轉智者附海舶歸風鳴浪湧智誦如意輪咒見如
意珠王相高十丈風息得濟智謀建高宇以答佛施
建災兵燬止存五丈觀音諺傳人有意度則云轉智

金史卷之二十一
卷六
者以此也乾道中孝宗常臨幸焉

龍華寺舊名龍華寶勝錢王以瑞萼園捨建有傅大士塔像拍板門槌司馬溫公祠堂今皆不存傅大士故漁人也遇嵩頭陀語曰我昔與汝於毗婆尸佛前發願度生汝今何時還兜率宮指令臨水觀影大士乃見圓光寶蓋便悟前因夫婦雙修頓通佛法梁武帝召見壽光殿共論真諦大士曰息而不滅帝又請講金剛經大士揮案一拍而起帝不喻再請講大士

乃索拍板升座唱四十九頌頌終而去蘇子瞻大士
像贊云善慧執板南泉作舞借我門槌為君打破元
未燬國朝宣德四年建

宋藉田在天龍寺下中阜規圓環以溝塍作八卦狀
俗稱九宮八卦田至今不紊

山旁有宋郊壇高禩壇淨明院大通院道林院寶惠
院般若院冲天觀玉虛觀烏菱池鴻鴈池玉津園並
廢 郊壇紹興二年建王元章詩蕩蕩南郊路金輿

不復行古臺餘草色新樹自風聲寂寞荒村景淒涼
故國情遺民能道舊曾是御營兵汪以質經故郊臺
詩云厭煩尋路僻偶爾入荒村古禮遵遺蹟園丘儼
至尊松風悲閒寂江月照黃昏餘恨無今古行人欲
斷魂 高禩壇紹興四年建內有鴻鴈池張仲舉詩
衰草寒烟老木風南朝佳氣落然空壁來山鬼遮秦
使槃泣僊人出漢宮壞堦尚傳祠乙鳥荒池曾見射
飛鴻騷人自古多荆思長在登臨感慨中 淨明院

郊壇齋宮有易安齋梅花岩江月庵節烏亭高宗梅
花岩詩怪石蒼岩映翠霞梅梢疎瘦正橫斜得因祀
事來尋勝試探東風第一花 寶惠院一名普濟吳

越王建 般若院吳越王建 烏菱池一名窰池

玉津園在嘉會門外紹興十七年建孝宗數臨幸命
羣臣燕射於此自後翠華罕駐景物漸衰陸務觀詩
云聖主憂民罷露臺春風別苑晝長開盡除曼衍魚
龍戲不禁芻蕘堆免來水鳥避人橫翠靄宮花經雨

委蒼苔殘年自喜身強健又作清都夢一回

稍南為妙因山吳越國文穆王忠獻王墓

文穆王名元瓘武肅王子忠獻王名仁佐文穆王子
舊有表忠觀蘇子瞻為之記云熙寧十年十月戊子
資政殿大學士右諫議大夫知杭州軍州事臣抃言
故吳越國王錢氏墳廟及其父祖妃夫人子孫之墳
在錢唐者二十有六在臨安者十有一皆蕪廢不治
父老過之有流涕者謹按故武肅王鏐始以鄉兵破

走黃巢名聞江淮復以八都兵討劉漢宏并越州以
奉董昌而自居於杭及昌以越畔則誅昌而并越盡
有浙東西之地傳其子文穆王元瓘至其孫忠獻王
仁佐遂破李景兵取福州而仁佐之弟忠懿王俶又
大出兵攻景以迎周世宗之師其後卒以國入覲三
世四王與五代相終始天下大亂豪傑蜂起方是時
以數州之地盜名字者不可勝數既覆其族延及于
無辜之民罔有了遺而吳越地方千里帶甲十萬鑄

山煮海象犀珠玉之富甲於天下然終不失臣節貢
獻相望於道是以其民至於老死不識兵革四時嬉
遊歌鼓之聲相聞至于今不廢其有德於斯民甚厚
皇宋受命四方僭亂以次削平兩蜀江南負其險遠
兵至城下力屈勢窮然後束手而河東劉氏百戰守
死以抗王師積骸為城醜血為池竭天下之力僅乃
克之獨吳越不待告命封府庫籍郡縣請吏於朝視
去其國如去傳舍其有功於朝廷甚大昔竇融以河

西歸漢光武詔右扶風修理其父子墳塋祠以太牢
今錢氏功德殆過於融而未及百年墳廟不治行道
傷嗟甚非所以勸獎忠臣慰答民心之義也臣願以
龍山廢佛祠曰妙因院者為觀使錢氏之孫為道士
曰自然者居之凡墳廟之在錢唐者以付自然其在
臨安者以付其縣之淨土寺僧曰道微歲各度其徒
一人使世掌之籍其地之所入以時修其祠宇封植
其草木有不治者縣令丞察之甚者易其人庶幾永

終不墮以稱朝廷待錢氏之意臣抃昧死以聞制曰
可其妙因院改賜名曰表忠觀銘曰天目之山茗水
出馬龍飛鳳舞萃於臨安篤生異人絕類離羣奮挺
大呼從者如雲仰天誓江月星晦蒙張弩射潮江海
為東殺宏誅昌奄有吳越金券玉冊虎符龍節大城
其居包洛山川左山右湖控引島蠻歲時歸休以燕
父老煜如神人玉帶毬馬四十一年寅畏小心筐篚
相望大貝南金五朝昏亂罔堪託國三王相承以待

有德既獲所歸弗謀弗咨先王之志我維行之天祚
忠孝世有爵邑允文允武子孫千億帝謂守臣治其
祠墳毋俾樵牧愧其後昆龍山之陽巋焉新宮匪私
於錢唯以勸忠非忠無君非孝無親凡百有位視此
刻文

稍北為玉厨山善慧禪寺

善慧寺元延祐間建伏龍岡禪師道場寺旁舊有真

覺院

妙因山之陽為江文昭公墓

江氏仁和世族其父玘舉景泰辛未進士歷官給事
中山東右叅政文昭公名瀾舉成化戊戌進士歷官
翰林院編修學士吏部左侍郎忤幸臣劉瑾出為南
京禮部尚書瑾誅贈太子少保賜謚其弟洵戊午舉
人瀾之仲子曉舉正德戊辰進士歷官吏部郎中布
政使府尹工部右侍郎隆慶初用臺諫言贈尚書三
子暉舉正德丁丑進士翰林院庶吉士諫止南巡出

為廣德知州召還編修修撰四子曜以恩廕歷官中
書舍人禮部員外郎曉子圻舉隆慶戊辰進士歷官
南京刑部主事郎中廣西提學僉事曜子埏以恩廕
歷官應天治中長蘆運同圻之子鐸舉萬曆甲戌進
士瀾之伯兄曾孫金丙子舉人仕宦蟬聯甲於一郡
世德清謹而叅政尚書侍郎修撰學使皆從祀府學
鄉賢祠侍郎修撰學使鐸皆以春秋魁榜尤士族所
稀也

西湖遊覽志卷六

欽定四庫全書

西湖遊覽志卷七

明 田汝成 撰

南山勝蹟

自清波門折而東南為鳳凰山

鳳凰山兩翅軒翥左薄湖澣右掠江濱形若飛鳳一郡王氣皆藉此山自唐以來肇造州治蓋鳳凰之右翅也錢氏因之遞加拓飾逮於南宋建都而茲山東

麓環入禁苑張閱華麗秀比蓬崑佳氣扶輿萃於一
脈開署布政駐輦宅中民吏之所憑依帝王之所臨
泣隱隱賑賑者六七百年可謂盛矣元時納胡僧之
說即故宮建五寺築鎮南塔以壓之而茲山到今落
寞乃即開元宮建省治面對吳山蓋鳳凰之左翅也
我朝因之而官司位署皆列左方為東南雄會豈非
王氣移易發洩有時也山據江湖之勝立而環眺則
凌虛鶩遠環異絕持之觀舉歸眉睫